

Enfocando riba intercambio di experticio y conocimiento pa promociona herencia Amerindio di Caribe Hulandes y bisiñanan

Think Tank di Museo Arqueologico Aruba inaugura

ORANJESTAD - Diaranson mainta Minister Michelle Hooyboer-Winklaar a inaugura e think-tank di Museo Arqueologico Aruba y Fundacion 1403, enfatisando e importancia pa Aruba y region pa intercambia conocimiento y creatividad cu e meta di hiba herencia cultural mas cerca di comunidad.

Un total di 28 participante lo delibera y discuti te cu diabierna awor den salanan di Museo Arqueologico Aruba e posibilidad pa organisa un exposicion internacional to-

cante e pasado rico di e culturan cu a biba den Caribe Hulandes y den region prome y despues di yegada di Europeoan.

For di exterior ta presente e.o. Dr. Laura van Broekhoven, kende ta hefe di investigacion di Museo di Etnografia na Leiden, Dr. Juanita Saenz Samper, hefe di Coleccionnan di Museo di Oro di Bogota y Dr. Antonio Curet, arkeologo experto den e cultura Taino. Ya durante sesionnan informal a papia tocante e similitud enorme di e coleccionnan

aki na Aruba y esnan den resto di Caribe Hulandes, Colombia, Puerto Rico y mas cu claro cu e artefactonan warda na Museonan na Hulanda.

E think-tank ta e comienso di locual mester bira un proyecto integral pa studia, documenta y presenta e coleccion y herencia Amerindio di un manera mas integral pues sin limite di fronteranan moderno.

Drs. Eduard Dresscher, presidente di Fundacion 1403, den su palabra di bon bini na participantenan, a incentiva nan pa nan comparti activamente



Riba e foto por mira dos indjan cu tabata pertenece na e tribu di Caribenan.

tur idea y inkietud pa asina por yega na un plan factibel pa ehecuta e proximo añanan. Na mesun momento a gradici Ministerio di Cultura, Mondriaan Fonds, Banco Central

di Aruba, Renaissance Hotel, Meta Corp., UNOCA, Ministerio di Turismo, Vertegenwoordiging van Nederland Op Aruba y Utilities Aruba pa sostene e proyecto. □